

《竹書紀年》研究文獻輯刊

(全十冊)

國家圖書館出版社

氏
母曰附寶
衡案拾遺記作吳樞宋志作符
史作符葆孝經鉤命訣云附寶

第五冊

《竹書紀年》研究文獻輯刊

國家圖書館出版社



(清)陳逢衡撰

竹書紀年集證

五十卷卷首一卷(卷二十四—卷三十五)

清嘉慶十八年(1813)刻本

第五冊目錄

竹書紀年集證五十卷卷首一卷(卷二十

四至卷三十五)(清)陳逢衡撰

卷二十四 一

卷二十五 四九

卷二十六 一〇三

卷二十七 一五七

卷二十八 二一一

卷二十九 二七三

卷三十 三二七

卷三十一 三六三

卷三十二 四三五

卷三十三 四七五

卷三十四 五三三

卷三十五 五六九

竹書紀年集證卷二十四

江都陳逢衡學

周武王下

十三年巢伯來賓

統箋案書敘曰巢伯來朝芮伯作旅巢命孔穎達曰
仲虺之誥云成湯放于南巢或此是也徐邈曰巢偃
姓之國今爲縣屬廬州府

衡案書敘巢伯來朝孔傳曰殷之諸侯伯爵也南方
遠國武王克商慕義而來李杞曰巢今無爲軍巢縣

卽其地也湯放桀于南巢巢人納之意者終商之世義不朝商乎誠如是亦足見巢之忠矣商亡而周興於是巢始來朝夫子錄其書蓋有所感也

薦殷於太廟

詩大雅既醉○世本古義曰神嘏也武王大祀宗廟禮成受釐宗祝傳公尸之辭以致告案竹書載武王滅商之次年薦殷于太廟遂大封諸侯此詩之作或在是時以令終有俶之語知之俶者始也武王卽位之始也

衡案薦殷于廟者薦殷俘也案逸周書世俘解惟一月丙午旁生魄若翼日丁未王乃步自于周征伐紂王紂二月既死魄越五日甲子朝至接于商則咸劉商王紂執矢惡臣百人太公望命禦方來丁卯望至告以馘俘戊辰呂他命伐越戲方壬申新荒至告以馘俘侯來命伐靡集于陳辛巳至告以馘俘庚子陳本命伐磨百韋命伐宣方新荒命伐蜀乙巳陳本令新荒蜀磨至告禽霍侯艾侯佚侯小臣四十有六禽禦八百有三百兩告以馘俘百韋至告以禽宣方

禽禦三十兩告以馘俘百韋命伐厲告以馘俘卽此薦殷之俘也然當在武王十二年案世俘解云維四月乙未武王成辟四方通殷命有國又云時四月旣旁生魄越六日庚戌武王朝至燎于周乃俾史佚繇書于天號孔晁曰使史佚用書重薦殷于天也據此則薦殷一事卽武成四月丁未祀于周廟越三日庚戌大告武成之事蓋惟四方之俘畢至故大告武成而薦于廟也今紀年係之十三年疑誤或曰此條與下文遂大封諸侯五字俱當在武王十二年夏四

王歸于豐饗于太廟之後錯簡在此蓋大封諸侯亦不得遲至伐殷踰年之後也

遂大封諸侯

史記漢諸侯王年表周封五等公侯伯子男武王成康所封數百而同姓五十五地上不過百里下三十里以輔衛王室○志疑案周封國之數左傳富辰言周公封建親戚凡二十六國成鱣言武王有天下兄弟之國十有五人姬姓之國四十人荀子儒效君道篇言周立七十一國姬姓獨居五十三人韓詩外傳

四言立國七十二姬姓五十二漢書諸侯王表言周封國八百同姓五十有餘後書光武紀言周封國八百同姓諸姬並爲建國阜陵王延傳言周之爵封千有八百姬姓居半皇甫謐言武王封諸侯四百人兄弟十五人同姓四十人其言各殊此云周封數百同姓五十五與成鱣及謐言合數百者八百也故高祖功臣表序云周封八百但時遙說異今不可詳矣大紀武王大建公侯于天下封黃帝之後於祝唐帝之後於薊虞帝之後胡公嬀滿於陳以備三恪封夏

石氏之後東樓公於杞封紂子武庚於殷皆爲上公
是爲二王之後得神農之後封之於焦封尚父於齊
周公於魯召公於燕庶叔高於畢皆留相周封叔鮮
於管叔度於蔡叔處於霍以監殷是爲三監以殷餘
民封康叔於朝歌國號衛封叔振鐸於曹叔武於邲
季載於邲封庶弟叔繡於滕叔鄭於毛又封諸叔於
郕於雍於原於郕於豐號仲虢叔爲文王卿士仲封
于西虢叔封於東虢初泰伯仲雍奔荆楚遂爲國自
號句吳泰伯薨仲雍嗣天子使求其後得周章仲雍

曾孫也世君吳矣因封之曰吳伯復封章弟爲虞仲
封少昊之裔茲輿於莒封祝融安期之裔挾于邾封
四嶽姜姓文叔于許封仲虺蕩雍滑之後於薛兄弟
之君十有五人同姓者四十人班宗彝作分器

衡案武王大封諸侯兼同異姓言或云八百或云千
八百國其異姓之國不能盡詳至同姓封國之數內
傳言武王有天下兄弟之國十有五人姬姓之國四
十人史記漢諸侯王年表從之世紀大紀亦從之荀
子謂姬姓五十三韓詩外傳謂姬姓五十二漢書諸

侯王表謂周封同姓五十有餘大畧參差不遠然封
一同姓必滅一舊國故孟子統言全數曰滅國者五
十承上文及紂之身天下又大亂來則所謂五十國
者蓋指文王末年及武王成王周公所滅之國而言
也故下文又引文謨武烈以證之案文王伐密伐崇
伐耆伐邶伐昆夷見大傳史記竹書又伐許魏見大
戴記又侵孟克莒舉鄆見韓子凡十國武王時戡黎
見尚書太公命禦方來呂他命伐越戲方侯來命伐
靡集于陳百弇命伐衛陳本命伐磨百韋命伐宣方

新荒命伐蜀告禽霍侯艾侯倬侯百韋命伐厲見
逸周書世俘解又見路史國名紀今案黎也方來也
越也戲也方也靡也陳也衛也磨也宣方也蜀也霍
也艾也佚也厲也凡十五國武王崩成王立三叔叛
周公召公內弭父兄外撫諸侯凡所征熊盈族十有
七國合之文武所伐者凡四十二國又其時同叛被
伐者商奄薄姑淮夷徐戎四國見書序凡四十六國
然書序止言薄姑而國名紀有落姑蒲侯蒲如姑幕
俱商時侯國皆薄姑之分是滅一薄姑以封齊而四

國皆滅可知矣合之共得五十國再案國名紀云成
王滅唐徙其後于許郢之間又一國孟子曰驅蜚廉
于海隅而戮之元和郡縣志絳州龍門蜚廉故城在
縣南七里國名紀云非蜚也蜚廉國非子祖也今旣
被戮則國有不滅者耶又一國外此若商有應侯而
周則邾晉應韓爲武之穆是滅商之應以封應猶滅
唐以封叔虞於唐也又一國呂氏春秋云商人服象
爲虐于東夷周公以師逐之又一國凡五十四國其
餘商世侯伯不見于載籍者無從考也

秋大有年

統箋案周頌曰綏萬邦屢豐年鄭箋曰誅無道安天下則亟有豐熟之年僖十九年傳寧莊子曰昔周饑克殷而年豐蓋謂此也又案春秋桓三年冬有年公羊傳曰有年何以書以喜書也大有年何以書亦以喜書也此其曰有年何僅有年也彼其曰大有年何大豐年也注曰宣十六年大有年

衡案老子謂大軍之後必有凶年蓋誠有見於天時人事之不假易也夫農不歸田而荷戈以待殺伐之

氣中於民心兵連禍結動輒累時往往爲疫爲旱爲
沴爲水爲厲爲災以應天譴有不屋懸其耜而田沒
于萊者哉武王之用兵也不然渡河誓師馳入帝都
如風捲沙如火尅木如水齧堤戎衣奮武不過一著
非有曠日遲久之累也西土之民談笑鼓舞東土之
民筐篚酒漿和之至也旣已易暴虐爲時雨化凶殘
爲仁風矣用是百穀用成以昭敷錫固其所也嗚呼
周自后稷稷繭叔均以來世積其德是爲田祖其後
公劉古公復能承先訓以教稼穡其勤勤于民事者